



МОНГОЛ УЛСЫН ЗАСГИЙН ГАЗРЫН ТОГТООЛ

2023 оны 06 сарын 14 өдөр

Дугаар 230

Улаанбаатар хот

«Боловсролын зээлийн сангийн талаар авах арга хэмжээний тухай»

Монгол Улсын Засгийн газрын тухай хуулийн 30 дугаар зүйлийн 1 дэх хэсгийг үндэслэн Монгол Улсын Засгийн газраас ТОГТООХ нь:

1. Төрийн байгууллага, төрийн өмчит хуулийн этгээдээс дээд боловсролын санхүүжилт хэлбэрээр олгож байгаа суралцагчийн тэтгэлэг, сургалтын зээл, санхүүгийн дэмжлэг олгох сонгон шалгаруулалтыг нэгдсэн журмаар Боловсролын зээлийн сангийн цахим системээр дамжуулан зохион байгуулахыг Боловсрол, шинжлэх ухааны сайд Л.Энх-Амгалан, Гадаад харилцааны сайд Б.Батцэцэг, Зам, тээврийн хөгжлийн сайд С.Бямбацогт, Уул уурхай, хүнд үйлдвэрийн сайд Ж.Ганбаатар нарт даалгав.

2. Боловсролын зээлийн сангаас тэтгэлэг, сургалтын зээл, санхүүгийн дэмжлэг олгох төрөл, сонгон шалгаруулалт, санхүүжилтийн өнөөгийн тогтолцоог дараах чиглэлээр өөрчлөх холбогдох хууль тогтоомж, дүрэм, журмын төсөл боловсруулж 2023 оны 07 дугаар сард багтаан Засгийн газрын хуралдаанд хэлэлцүүлэхийг Боловсрол, шинжлэх ухааны сайд Л.Энх-Амгаланд даалгасугай:

а/төрөөс үзүүлэх санхүүгийн дэмжлэгийн төрлийг судлан шинэчлэх;

б/суралцагчийн суралцах хөтөлбөр, чиглэл, тэтгэлэг, сургалтын зээл, санхүүгийн дэмжлэгийн зорилго, шаардлага, шалгуурыг тус тусад нь нарийвчлан тогтоох;

в/сонгон шалгаруулалт, санхүүжилтийн үйл ажиллагааг ил тод, нээлттэй, шударга, хүртээмжтэй болгох;

г/сонгон шалгаруулалтыг зохион байгуулах үйл явцад хүний оролцоог бууруулж, бүрэн цахимжуулах;

д/суралцагчид олгосон тэтгэлэг, сургалтын зээл, санхүүгийн дэмжлэг, үр дүнг суралцагч бүрээр жил бүр үнэлж, дүгнэдэг болох;

е/сургалтын зээл, санхүүгийн дэмжлэгийн эргэн төлөлт хийх, дуусгавар болгох нөхцөл, журмыг тодорхой болгох;

ё/ажлын гүйцэтгэл, үр дүнгээр шалгарсан төрийн албан хаагчийг захиалгаар магистрын зэргийн өмнөх хэлний бэлтгэл болон боловсролын зэргийн сургалтад тэтгэлгээр суралцуулах;

ж/төрийн байгууллага, төрийн өмчит хуулийн этгээдээс дээд боловсролын санхүүжилт хэлбэрээр олгож байгаа суралцагчийн тэтгэлэг, санхүүгийн дэмжлэгийг нэгтгэх зохион байгуулалтын арга хэмжээ авах;

з/дээд боловсролын санхүүжилт олгох сонгон шалгаруулалтыг нэгдсэн журмаар зохион байгуулах процессын загварчлал хийх зохион байгуулалтын арга хэмжээ авах.

3. Салбарын хүний нөөцийн хэрэгцээг тэргүүлэх болон эрэлттэй мэргэжлийн чиглэлийн дагуу тодорхойлж, захиалгыг жил бүр Боловсрол, шинжлэх ухааны яаманд хүргүүлэхийг Засгийн газрын гишүүдэд даалгасугай.

4. Энэ тогтоолын хэрэгжилтэд хяналт тавьж ажиллахыг Монгол Улсын сайд, Засгийн газрын Хэрэг эрхлэх газрын дарга Д.Амарбаясгаланд үүрэг болгосугай.

